

**ZAKON
O IZMJENAMA I DOPUNAMA ZAKONA O PRIVATIZACIJI PREDUZEĆA**

Član 1.

U Zakonu o privatizaciji preduzeća („Službene novine Federacije BiH“, br.27/97, 8/99, 32/00, 45/00, 27/01, 27/02, 61/01, 33/02, 28/04, 44/04 i 42/06) iza člana 3. dodaje se novi član 3a. koji glasi:

„Član 3a.

Za potrebe državnih organa može se izuzeti stalno sredstvo bez naknade i izvršiti prijenos vlasništva sa preduzeća na nadležnu vladu koja vrši ovlaštenja na osnovu državnog kapitala u tom preduzeću.

Odluku o izuzimanju sredstava donosi Skupština preduzeća na prijedlog nadležne vlade“.

Član 2.

U članu 6. u stavu 3. oznaka „DEM“ zamjenjuje se oznakom „KM“, a preostali dio teksta se briše.

Član 3.

U članu 7. u stavu 2., u članu 25. u stavu 2. i u članu 26. tačka a) oznaka „DEM“ zamjenjuje se oznakom „KM“.

Član 4.

U članu 7. u stavu 1. iza riječi „Federacije“ zarez se zamjenjuje tačkom, a preostali dio teksta se briše.

U stavu 5. na kraju teksta tačka se zamjenjuje zarezom i dodaje tekst: „a na osnovu rješenja nadležne agencije za privatizaciju o odobrenju upisa izvršene privatizacije tih dijelova u sudski registar“.

Član 5.

U članu 8. stav 2. mijenja se i glasi:

„U početnom bilansu preduzeća za privatizaciju ne iskazuju se prirodna bogatstva i dobra u općoj upotrebi, objekti od općeg kulturnog i historijskog značaja koje preduzeće koristi u obavljanju svoje djelatnosti.“

U članu 8. dodaje se novi stav 4. koji glasi:

„Sredstva iz stava 3. ovog člana mogu se izuzeti i u skladu sa odredbama člana 1. ovog Zakona“.

U članu 8. dodaje se novi stav 5. koji glasi:

„Isknjižavanje knjigovodstvene vrijednosti stalnog sredstva iz poslovnih knjiga izvršit će se na teret državnog kapitala“.

U članu 8. dodaje se novi stav 6. koji glasi:

„U slučaju potrebe Privredno društvo odnosno Vlada osigurat će sredstva za zaštitu manjinskih prava dioničara u skladu sa zakonom o privrednim društvima“.

U članu 8. stav 4. postaje stav 7., mijenja se i glasi:

„Sredstvima iz stava 2. ovog člana preduzeće ne može raspolagati u pravnom prometu i dužno ih je koristiti pažnjim dobrog privrednika do konačnog rješavanja statusa tih sredstava u skladu sa posebnim zakonima“.

Član 6.

Član 10. mijenja se i glasi:

„ U slučaju da u propisanom roku nije donesen program privatizacije, ili je doneseni program za određeno preduzeće odbijen, odluku o načinu privatizacije tog preduzeća donijet će nadležna vlada na prijedlog nadležne agencije za privatizaciju.“

Član 7.

U članu 11. stav 2. mijenja se glasi:

„O načinu, odnosno metodu privatizacije odlučuje vlada nadležna za upravljanje državnim kapitalom u tom preduzeću, a postupak privatizacije u skladu sa ovim zakonom i odlukom nadležne vlade provodi Agencija za privatizaciju kantona, odnosno Federacije Bosne i Hercegovine u zavisnosti od toga koja vlada ostvaruje pravo upravljanja u tom preduzeću“.

Stav 3. mijenja se i glasi:

„Prodaju preduzeća nadležna agencija provodi putem:

- otvorenog prikupljanja ponuda (tender);
- neposredne pogodbe;
- berze;
- otvorenog nadmetanja i
- otvorene ponude dionica za novac.“

Stavovi od 4. do 7. se brišu.

Član 8.

U članu 11a. st.1. i 2. se brišu.

U dosadašnjem stavu 4. broj „3“ zamjenjuje se brojem „1“.

Dosadašnji stavovi od 3. do 5. postaju stavovi 1. do 3.

Član 9.

U članu 12. u stavu 2. alineja 1. mijenja se i glasi:

„- preduzeća, u kojima je više od 50% državni kapital“.

Alineja 3. se briše.

U alineji 4.i 5. riječi: „i 3.“ se brišu.

Dosadašnje alineje od 4. do 6. postaju alineje od 3. do 5.

Član 10.

Član 14. mijenja se i glasi:

„Pravila prodaje preduzeća putem otvorenog prikupljanja ponuda (tebder), neposredne pogodbe, berze, otvorenog nadmetanja i otvorene ponude dionica propisuje Agencija Federacije“.

Član 11.

U članu 15. stav 1. mijenja se i glasi:

„Ugovor s kupcem o prodaji dionica ili udjela preduzeća u pisanom obliku zaključuje nadležna agencija iz člana 11. stav 2. ovog Zakona.“

Član 12.

U članu 16. iza riječi „dionica“ dodaje se zarez i riječ „udjela“.

Iza stava 1. dodaje se novi stav koji glasi:

„Kupac do potpune realizacije kupoprodajnog ugovora ne može firmu koja je predmet privatizacije zadužiti hipotekarnim kreditom“.

Član 13.

U članu 20. u stavu 1. alineja 1. se briše.
Dosadašnje alineje 2. i 3. postaju 1. i 2.

Član 14.

U članu 27. u stavu 1. iza riječi „Federacije“ zarez se zamjenjuje tačkom a preostali dio teksta se briše.

Stav 4. mijenja se i glasi:

„Prodaju iz člana 26. stav 1. tačka a) kao prodavac provodi Agencija za privatizaciju, a za prodaju u slučajevima iz člana 26. stav 1. tač. b) i c) prodavac je preduzeće, a prodaju provodi nadležna agencija za privatizaciju“.

Član 15.

U članu 28. iza riječi „novcu“ stavlja se tačka a preostali dio teksta se briše.

Član 16.

Naziv Poglavlja VII. mijenja se i glasi:

„VII. PROMJENA STRUKTURE KAPITALA PREDUZEĆA, ZAJEDNIČKO
ULAGANJE I RASPOLAGANJE NEPRIVATIZIRANIM KAPITALOM I IMOVINOM“

Član 17.

Član 30. mijenja se i glasi:

„Preduzeće može izdati nove dionice ili sticati nove udjele u cilju privatizacije putem pribavljanja dodatnog kapitala (dokapitalizacije) ili konverzije duga u dionički kapital ili udio i u slučaju potraživanja povjerilaca i radnika.

Iz stava 1. ovog člana izuzimaju se javna preduzeća iz oblasti elektroenergetskog sektora, telekom sektora, poštanskog prometa i željezničkog prometa.

Dokapitalizacija u smislu stava 1. ovog člana može se vršiti ulaganjem u novcu, stvarima i pravima.

Odluku o promjeni strukture kapitala donijet će nadležna agencija, uz saglasnost nadležne vlade.

Pravilnik za promjenu strukture kapitala, u skladu sa ovim članom, propisat će Vlada Federacije Bosne i Hercegovine u roku od 60 dana.

U slučaju potrebe privredno društvo ili Vlada osigurat će sredstva za zaštitu manjinskih prava dioničara, u skladu sa zakonom o privrednim društvima.“

Član 18.

Iza člana 30. dodaje se novi član 30a. koji glasi:

„Član 30a.

Nadležna agencija, uz saglasnost nedležne vlade može promjenu strukture aktive preduzeća vršiti zaključivanjem ugovora o zajedničkom ulaganju, s tim da je izbor pratnera potrebno osigurati u skladu sa principima javnosti i konkurentnosti.

Pravilnik za promjenu strukture aktive preduzeća na osnovu zajedničkog ulaganja uređuje se posebnim propisom koji donosi Vlada Federacije Bosne i Hercegovine u roku od 60 dana.“

Član 19.

U članu 31. u stavu 1. riječ „dionicama“ i zarez se brišu.

U stavu 2. iza riječi „dionica“ dodaju se riječi: „ili udjela“.

Član 20.

U članu 33. st. 1.i 2. mijenjaju se i glase.

„Novčana sredstva ostvarena izdavanjem novih dionica ili sticanja novih udjela radi pribavljanja dodatnog kapitala (dokapitalizacije) pripadaju preduzeću.

Novčana sredstva ostvarena prodajom preduzeća iz nadležnosti Agencija za privatizaciju i kantonalnih agencija sa izuzetkom dijela sredstava namijenjenih za finansiranje Agencije Federacije i kantonalnih agencija na koja su saglasnost dale nadležne vlade (Vlada Federacije, vlada kantona), prebacuju se na poseban fond Razvojne banke Federacije Bosne i Hercegovine, kojim upravlja Vlada Federacije Bosne i Hercegovine, a za novčana sredstva ostvarena u procesu privatizacije iz nadležnosti kantonalnih agencija sredstvima sa posebnog fonda upravlja vlada kantona u kojem je ostvaren konkretan prihod“.

U stavu 3. riječi: „Nadležne vlade“ zamjenjuje se riječima: „Razvojna banka Federacije Bosne i Hercegovine“.

Član 21.

U članu 34. u stavu 1. tačka 4. se briše.

Stav 3. se briše.

Član 22.

Član 37. se briše.

Član 23.

Postupci koji su pokrenuti do dana stupanja na snagu ovog Zakona, kao i postupci po redovnim pravnim sredstvima koji su u toku, dovršit će se prema odredbama ovog Zakona.

Član 24.

Ovaj Zakon stupa na snagu narednog dana od dana objavljivanja u „Službenim novima Federacije BiH“.